

CBETA電子佛典集成

CBETA Chinese Electronic Tripitaka Collection
eBook

T19n1008

菩提場莊嚴陀羅尼經

唐 不空譯

目次

- [編輯說明](#)
- [章節目次](#)
- [卷目次](#)
 - .001,
- [贊助資訊](#)

編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 1008

菩提場莊嚴陀羅尼經

開府儀同三司特進試鴻臚卿肅國公食邑三千戶賜紫贈司空謚大鑒正
號大廣智大興善寺三藏沙門不空奉 詔譯

如是我聞：

一時薄伽梵住筏羅痾斯大城廣博大園，與苾芻眾五千人俱，皆是大阿羅漢，諸漏已盡、所作已辦、逮得己利、斷諸有結。復有菩薩摩訶薩五百人俱。

爾時世尊滿月十五日而坐說法，其眾會有無量俱胝那庾多百千有情，婆羅門、刹利、梵志、尼乾子等，及餘外道戲論幻術、居屍林納衣持牛戒者、居山谷持禁戒者，復與大天眾，皆於佛前眾會而坐。時大眾會邪見異道心懷疑難，如來愍念皆安慰之，恣其所問。復有天、龍、藥叉、乾闥婆、阿修羅、伽樓羅、緊那羅、摩睺羅伽、人非人等，前後圍遶而坐。復有天帝釋，與忉利天子天眾百千眷屬前後圍遶來至佛所。復有梵王，與娑訶世界主梵眾天子百千眷屬皆來集會。復有日月天子、寶賢、滿賢、賢力天等，與大藥叉將眾，及大自在天、那羅延天、焰魔天、水天、俱尾羅天、四大天王、吉祥天女、辯才天女、訶利帝母、商棄尼天女、花齒天女、訶利帝五百子等，皆與眷屬眾會而坐。復有娑伽羅龍王、難陀龍王、烏波難陀龍王，與無量百千龍眾圍遶。復有緊那羅王、摩呼羅伽王，與無量眷屬前後圍遶，作大供養而住聽法。

其大眾會有大婆羅門名毘鈕達多，住波吒離子城。是婆羅門多諸財寶豐饒巨富，與毘沙門天王等敵。是婆羅門多聞聰哲智慧審慮、諦修善品意樂淨信、極善歸依三寶，優婆塞中最为第一。其婆羅門為無子息，晝夜作是思惟：「若無子息，當生何趣？又斷我族。」婆羅門又作思惟：「大師佛世尊即是我父，我是佛子，真正妙法是我之母，僧伽聖眾是我兄弟。今生有幸遇大吉祥及於來世，我今問佛世尊修何法行？我由修行一法，收攝一切善根，迴向於無上正等菩提，常恆三寶種永不斷絕，由此福因緣得有子息。我今欲問世尊修何法行。」爾時毘鈕達多大婆羅門，往詣世尊，遶佛三匝。

合掌禮佛而白佛言：「世尊！能以一法積集一切善根，所謂證得無上正等菩提，即成共諸三寶善根無盡，令我獲得子息。」世尊告言：「善哉善哉！大婆羅門！能問如是義。汝今當聽，極善作意，吾今為汝廣稱讚敷演。大婆羅門！有菩提場莊嚴陀羅尼大教王，由此陀羅尼，種植一切善根、能滿一切意願。我念過去世，於婆吒離子城東門外有一大園，其園名阿蘇離園，中有羅刹女住，名花阿蘇

離。其羅刹女稟性暴惡威怒，千由旬內所有男女、童男童女，奪其精氣。波吒離子城中人民常被驚怖、懷大憂懼，互相瞻視咸言：『作何方便？』時眾多耆舊告諸人眾：『汝等諦聽。我等聞佛出世，其佛號曰妙光幢如來應供正遍知，汝等應當往詣彼佛世尊所，問佛世尊，救濟汝等憂懼之難。』時諸人眾白耆舊言：『世尊今者在於何處？』耆舊答言：『世尊今在半遮羅聚落。』是諸人眾復白耆舊：『我等作何方便？』耆舊告言：『汝等還歸，可於淨處以瞿摩夷和土塗作方壇，四方齊整散諸雜花，置四香鑪、四餅香水，并四疊食、然四盞燈。又取一頻伽餅滿盛香水，取一齒木安於餅上。應當啟請彼如來言：「惟願世尊明日食時降臨於此。」如來悉知過去未來現在之事，如來拔濟一切有情墮險趣者，地獄、餓鬼、畜生常令解脫。如來必當食時降赴，以大神通并諸眷屬來至波吒離城。』時諸人眾聞此語已，眾人咸集高顯淨處，以瞿摩夷和土塗壇，以種種花散其壇上，嚴飾賢餅，置種種食飲、塗香、燒香，然燈置於四方，種種音樂，金頻伽寶莊嚴餅滿盛香水，齒木安於餅上，置壇中心，以和雅音高聲作是唱言：『稽首歸命妙光幢如來世尊應正等覺！稽首歸命憐愍一切有情大牟尼世尊！稽首歸命奇特法性佛世尊！惟願拔濟我等受苦眾生。惟願明日食時來受我供，安慰我等一切有情，為歸為依、為作善趣，解脫我等極甚怖畏險惡難處。』時大人眾纔發此言，於其處地六種震動，頻伽寶餅傾倒於地，即成大蓮華池，天妙八功德水充滿其中，其水香淨不冷不熱令人悅意。其池水中有種種花，所謂青蓮華、紅蓮華、赤蓮華、白蓮華滿於池內，金砂布地。四道寶塔以種種寶間錯莊嚴。即其齒木變為寶樹，高六由旬，縱廣正等有八由旬，其樹根莖枝葉花果皆七寶所成。復於是處其地寬廣嚴淨，面各十二由旬，成一大曼荼羅。其處令人愛樂，殊麗端嚴。處處皆有種種水陸諸花，於花樹上有種種鳥，鸚鵡、孔雀、迦陵頻伽、共命之鳥，及餘吉祥諸鳥，金嘴、金髻，毛羽皆是七寶所成，出和雅音。其地種種花樹以為莊嚴，所謂多摩羅樹、瞻蔔花樹、波吒羅樹、無憂樹、阿低木多迦樹、蘇摩那樹、迦南摩樹、拈羅樹、大拈羅樹、竭乳羅樹、祥薇花樹、止藍拏迦樹、庾體(他以反)迦樹、信拏迦縛離樹等。皆是妙光幢如來本願菩提場莊嚴陀羅尼神力加持故，作大神變。時波吒離子人眾心生奇特，互相視言：『今所現者，大神通相先應而現，誰之威力？誰之神通？於此瞻部洲現大利益現大功德，當於世間現此瑞相，與諸有情成大利益。』時彼人眾互相視言：『汝等各去營辦種種殊勝飲食，明日請佛廣大供養。』時彼人眾各還本家，其夜營辦種種飲食色香美味，香花塗香末香、幢幡音樂，與多眷屬將至中路祇候世

尊。時妙光幢如來在半遮邏大聚落中，與大眾會說法教化。於大眾前忽現七寶所成頻伽水餅并及齒木。

「爾時世尊見已微笑，即舒百千福莊嚴金色臂，取頻伽餅并及齒木，寂然而住。爾時大眾見此事已，咸生奇特歎未曾有，現此瑞相，未知何方迎請世尊。

「爾時眾中有一菩薩摩訶薩名妙清淨慧，往詣佛所，頭面禮足，右繞三匝而白佛言：『世尊！此之瑞相從何而來？現頻伽水餅并及齒木奉請世尊。』佛言：『此頻伽餅、齒木從波吒離子大城而來。』告妙清淨慧菩薩言：『汝可行籌，隨從我者以大神力，明日晨朝當入波吒離子大城。』時妙清淨慧菩薩摩訶薩聞是語已尋即行籌，告諸聲聞眾、菩薩眾：『有大神通能作神境通者，可受此籌，明日晨朝入波吒離城。』時清淨慧菩薩遍行籌已，即請世尊。

「爾時世尊於晨朝時，齊整衣服，以大威嚴、以大眷屬、以大神力遊戲加持，與諸大眾即乘虛空，天、龍、藥叉、乾闥婆、阿修羅、迦樓羅、緊那羅、摩睺羅伽作大音樂，以種種香花塗香末香、衣服嚴具，於虛空中供養如來。以佛神通，於須臾頃至波吒離子大城，從空而下，至寬廣嚴淨大曼荼羅處坐師子座，彼大眾各各自乘化宮殿而來會坐。時城中人眾以佛威神力，各持種種供養世尊及彼大眾，菩薩聲聞眾、天龍八部眾、聲聞眾。世尊知食時將至，皆令坐食，種種色香美味飲食恣意食足。

「爾時大眾食已洗漱，整理衣服，以大神通復以供養旋遶三匝，各於佛前次第而坐。即以上事白佛言：『世尊！於此城東門外有園，名阿蘇離。於彼園中有羅刹女，名花阿蘇離。其性暴惡，常奪男女、童男童女精氣，晝夜常懷害心。惟願世尊開示方便，除此災害。』

「爾時妙光幢如來安慰大眾，寂默而住示現微笑，從佛面門出種種光明，以此其光照曜三千大千世界，及照阿蘇離園羅刹女并百千眷屬。佛威神力，令彼羅刹女并諸眷屬四方馳走，其園被燒如一火聚，悲聲號哭十方奔走：『我等歸誰？誰當救我？』是時城中有諸天眾，空中出聲告言：『汝等可往妙光幢如來所稽首歸依，當令汝獲得安樂。』時彼花阿蘇離羅刹女百千眷屬忙然，往詣佛所，頭面禮足，白佛言：『惟願世尊救我。惟願薄伽梵救我。惟願修伽陀救我。世尊！我從今已後更不敢害諸有情，更不敢侵惱有情。』時妙光幢如來默然而許，即入菩提場遊戲神通加持三摩地。由入此三摩地故，照曜十方一切佛刹，彼刹中一切如來悉皆顯現，并聞為大眾說法音聲。時妙光幢如來說菩提場莊嚴陀羅尼，彼十方世界中如來皆讚言：『善哉善哉！妙光幢如來！善說菩提場莊嚴陀羅尼教王，令調伏花阿蘇離羅刹女并及眷屬，安立十善業道，并諸人眾令得不

退轉地置於善道。』即其城地七寶所成，及兩七寶，其瞻部洲人民豐饒安樂。大婆羅門！我當彼之時為婆羅門童子，年始七歲，聞此陀羅尼，於佛教中得生淨信，便證無上正等菩提。大婆羅門或有猶豫生疑者，往昔時花阿蘇離羅刹女豈異人乎？即汝身是。何以故？汝花阿蘇離羅刹女，時損害眾生無有慈心，經無量劫墮於惡趣。大婆羅門！莫生疑惑：當彼之時波吒離子城中人眾，今此天、龍、藥叉、乾闥婆、阿修羅、迦樓羅、緊那羅，今來雲集者是？大婆羅門或生猶豫或生疑惑，當彼之時羅刹女百千眷屬者，不應如是見。何以故？是我集會中婆羅門、刹利、梵志、尼乾子，及餘外道戲論幻術者、居屍林納衣持牛戒者、居山谷持禁戒者等是。」

爾時釋迦牟尼如來說往昔因緣已，默然而住。時一切大眾聞此往昔因緣，皆生奇特，持種種香花塗香末香、花鬘衣服幢幡，往詣世尊所而作供養，右遶三匝頭面禮足，而作是言：「惟願世尊說菩提場莊嚴陀羅尼教王。惟願世尊說。惟願修伽陀說此大明王，令一切有情作大光明，於後末世一切有情能滿諸願。」

爾時世尊大眾請已，默然而住受請微笑。現微笑後，從其面門出種種光，照曜十方世界。照曜已，彼世界中一切諸佛悉皆顯現，又聞彼諸如來說法語言。於此地中即生七寶樹，其樹根莖枝葉花果殊勝，天妙悅意受用安樂，現於瞻部洲。其樹現大遊戲神通加持。

爾時文殊師利童真菩薩見此神通及見如來微笑，往詣世尊，頭面禮足，繞佛三匝合掌向佛，白佛言：「世尊！惟願說菩提場莊嚴陀羅尼教王。惟願善逝說之，與一切有情作大利益，長養一切種植善根者。」

爾時釋迦牟尼如來受文殊師利童真菩薩請，即入觀佛三摩地。由纔入此三摩地，於剎那頃見十方世界刹土一切諸佛，如一箭道。彼十方世界九十俱胝百千恒河沙數諸佛皆來集會，同聲讚釋迦牟尼如來言：「善哉善哉！釋迦牟尼如來！善說此大陀羅尼教王，過去一切如來已說，悉皆加持隨喜。惟願世尊廣為宣說菩提場莊嚴陀羅尼法要大教王儀軌。」

爾時文殊師利童真菩薩，以如來所生法界盛於鉢中，二手捧鉢奉獻如來。

爾時釋迦牟尼如來舒金色臂，受文殊師利童真菩薩鉢。受已擲於空中，於剎那頃其鉢遍滿虛空，所盛法界舍利如來形像滿三千大千世界虛空，彼如來咸皆讚歎釋迦牟尼如來言：「善哉善哉！釋迦牟尼佛！」見彼一一如來前，皆有釋迦牟尼佛并大眾會，一一釋迦牟尼佛前復有文殊師利菩薩，滿鉢盛法界奉獻，現大神通現大神變。

爾時金剛手菩薩摩訶薩白文殊師利童真菩薩言：「甚奇特！文殊師利童真菩薩！現於如來大眾會神變。今此光相為誰所現？以何因

緣？是誰威神現大如來形像集會？」

文殊師利言：「金剛手！汝豈不知現此光相神變耶？」金剛手言：「文殊師利！我昔未曾見聞如是大神通一切如來集會。此之希有未曾見聞，今乃得見。」爾時金剛手菩薩摩訶薩旋轉金剛杵右遶世尊，佛前而住，白佛言：「世尊欲說何法？今有未曾見聞相現，於世間中大神通相分明而現。」佛言：「金剛手！且待須臾，當自證見。」於剎那頃，佛前忽然有七寶柱從地踊出，高七千踰繕那、闊五千踰繕那，天妙莊嚴光明熾盛，垂妙繒綵真珠羅網彌覆其上，鈴鐸搖動出和雅音，花鬘莊嚴，無量俱胝百千天子從空而下，持種種七寶供養具而供養寶幢。

爾時世尊告金剛手菩薩言：「汝可往開幢門。」

爾時金剛手菩薩遍身光焰如火聚熾盛，頭冠瓔珞莊嚴其身，執金剛杵，面貌忿怒令人怖畏，近至寶幢而申右臂開其幢門。開幢門已，於是幢中有師子座，其座閣浮檀金所成，七寶莊嚴，以種種天妙衣服敷其座上，廣博面金口高勇光明幢頂如來應供正遍知如來於上而坐，入三摩地而現。

爾時廣博金口高勇光明幢頂如來，讚歎釋迦牟尼佛言：「善哉善哉！釋迦牟尼如來！於世間中現大神變、現大如來集會，無有神變、集會與此等者，先佛等覺而亦未有此如來集會神通示現。唯願世尊說此菩提場莊嚴陀羅尼教王，成多人利益，安樂哀愍。此如來形像遊戲神通集會現此幢相，皆是菩提場莊嚴陀羅尼威力現此神變，亦是此陀羅尼加持先現此瑞。惟願世尊說菩提場莊嚴陀羅尼大教王。」

爾時釋迦牟尼如來受廣博面金口高勇光明幢頂如來請已，即說菩提場莊嚴陀羅尼曰：

「曩謨娑嚩訶帝尾補攞嚩娜曩建贊努得訖使(三合)鉢多(二合)鉢囉(二合)娑(引)娑計覩母囉馱寧(二合)薩嚩但他(引)藥路寫曩謨娑嚩訶帝捨(引)枳也(二合)母曩曳但他(引)藥多(引)夜(引)囉賀(二合)帝三藐三沒馱(引)野但爾也(二合)他(引)唵冒地冒地冒地冒地薩嚩但他(引)藥多虞(引)者囉馱囉馱囉賀囉賀囉鉢囉(二合)賀囉鉢囉(二合)賀囉麼賀(引)冒地唧多馱囉主盧主盧捨怛囉濕弭(二合)散祖爾帝薩嚩但他(引)藥多毘色訖帝(二合)虞[寧*頁]虞拏嚩帝沒馱虞拏嚩娑細弭里弭里誡誡曩怛麗薩嚩但他(引)藥多地瑟耻(二合)帝曩娑薩多(二合)麗捨麼捨麼鉢囉(二合)捨麼鉢囉(二合)捨麼薩嚩播(引)跛鉢囉(二合)捨麼寧薩嚩播(引)跛尾輪(引)馱寧虎盧虎盧麼賀冒地末(引)誡三鉢囉(二合)悉體(二合)帝薩嚩但他(引)藥多鉢囉(二合)底(丁以反)瑟耻(二合)多秬第娑嚩(二合引)訶(引)」

纔說此菩提場莊嚴陀羅尼大教王已，十方一切諸佛皆讚言：「善哉善哉！」及所現一切如來稱：「善哉善哉！釋迦牟尼如來善說此陀羅尼教王，利益安樂一切有情。」爾時大地六種震動，兩種種花，雨塗香末香、衣服嚴具、真珠臂釧、頭冠瓔珞。諸天於空中奏種種音樂，出微妙聲，兩種種花，所謂青蓮華、紅蓮華、赤蓮華、白蓮華、曼陀羅華、摩訶曼陀羅華、盧遮華、曼殊沙花、摩訶曼殊沙花、蘇摩那花、婆利師迦花、瞻蔔花、搔乾地花，以種種花而供養佛。今於如來大集會聞此大陀羅尼，或有證得阿羅漢果、或證緣覺菩提果、或有證斯陀含果、或有證阿那含果、或有證須陀洹果、或有住菩提心、或有得不退轉地、或有得授無上正等菩提記、或有生天果報，或在地獄受諸苦惱悉皆解脫，或有生焰魔界或生傍生或有生於鬼趣，彼等悉皆解脫安置佛道。於此閻浮提大示現種種神通，其世界眾生皆熾盛歡悅，人民充滿豐饒安樂。

爾時金剛手祕密主頂禮佛足，合掌白佛言：「世尊說此陀羅尼教王，甚極難得。若有苾芻、苾芻尼、優婆塞、優婆夷、善男子善女人，聞此陀羅尼，受持讀誦、為他宣說、如理作意，生幾所福成就？」佛言：「善哉善哉！金剛手大祕密主！妙問如是義。此問極端嚴極善妙問。金剛手！汝可往詣文殊師利菩薩所問，應當為汝廣分別說。」

爾時金剛手即詣文殊師利菩薩所，右遶文殊師利菩薩，白言：「若有人受持讀誦、為他宣說、如理作意此菩提場莊嚴陀羅尼，得幾所福？」文殊師利童真菩薩告金剛手言：「諦聽，我今以譬喻說。盡三千大千世界處所有土地山川埵阜，枳為百分千分乃至細如毛端分，我不見一處微塵不周遍。我又以天眼觀如來身分舍利，亦遍一切處。我無不見如來法身分舍利、法界舍利、骨舍利、肉舍利，如一芥子量空界而不周遍。或有人具大威德神通，悉能算數觀察度量可知其數，金剛手！其人是為智慧是為聰哲耶？」金剛手言：「文殊師利！是人甚奇特希有。」文殊師利復言：「金剛手！諦聽。如上微塵舍利，算數觀察度量可知其數。復次金剛手！所有一切微塵、一切身分舍利，准如上數微塵、准如上數舍利數量，爾所如來或住一劫或餘一劫或復千劫，讚揚此菩提場莊嚴陀羅尼教王功德，不能譬喻校量盡其功德福利。金剛手！此菩提場莊嚴陀羅尼教王有如是威德，若有受持讀誦、為他宣說、供養經卷，當知是人獲無量無邊功德，不可窮盡。」

彼大眾集會天、龍、藥叉、乾闥婆、阿蘇囉、迦樓羅、緊那羅摩、睺羅伽及彼眾中有情，從文殊師利童真菩薩聞此所說功德，皆得阿耨多羅三藐三菩提不退轉地，所謂阿耨多羅三藐三菩提記，咸皆三

度嗚陀南讚歎：「曩謨歸命釋迦牟尼應供正遍知佛世尊。曩謨歸命奇特神通佛世尊。曩謨歸命作奇特業佛世尊。」

爾時金剛手大祕密主白文殊師利童真菩薩言：「云何於此菩提場莊嚴陀羅尼大教王種植善根？」文殊師利童真菩薩言：「金剛手！此義當問如來，如來悉知是義。」

爾時金剛手祕密主往詣佛所，遶佛三匝而白佛言：「云何於此菩提場莊嚴陀羅尼種植善根？」佛言：「金剛手！汝今諦聽，當為汝說此陀羅尼種植善根法。金剛手！若有善男子善女人，欲求種植善根修無上菩提道資糧者，苾芻、苾芻尼、優婆塞、優婆夷，或善男子善女人，淨信善心者，應受持此陀羅尼，以此積集善根。若有淨信善男子善女人，比丘、比丘尼、優婆塞、優婆夷，澡浴清淨著新淨衣，以瞿摩夷和土塗作方曼荼羅，以五淨灑，隨力分散花燒香供養，以菩提場莊嚴陀羅尼加持香水七遍浴佛形像，復加持白檀香用塗佛上，又加持鬱金香塗上，隨力分供養旋遶禮拜，對於佛前誦一遍燃一盞燈。金剛手！我今說彼即為種植善根。金剛手！我今作譬喻說，三千大千世界大龍王降微細雨，或有一人有大神力能數是雨滴。我復作譬喻說，以彼算計籌量可知其數。彼善男子善女人，苾芻、苾芻尼、優婆塞、優婆夷，准如上雨滴數，如來應正等覺所承事供養禮拜，或於一劫或過一劫乃至百劫，生如是功德聚，可知其福。如上浴像種植善根所生功德，一切如來不能知其數量。」

「復次金剛手！第二校量福德。以少善根因緣，能成就廣善根果報。此菩提場莊嚴陀羅尼於樺皮上書，或置金剛杵中、或置佛像中、或置畫像上、或置印塔中、或置窠堵波中，隨於一事置此陀羅尼，即成造百千數。若置一窠堵波中，彼善男子善女人即成造百千窠堵波，其人獲得爾所造塔功德種植善根。金剛手！若有苾芻、苾芻尼、優婆塞、優婆夷，善男子善女人，於四衢道、或高山頂、或於河岸、或於城門、或王道路，造作一大窠堵波，寫此陀羅尼并經置於相輪槿中，如我先譬喻說，滿三千大千世界微塵數量法身舍利、法界舍利、骨舍利、肉舍利，彼善男子善女人即成造如上爾所微塵舍利等數量窠堵波，即成一切如來舍利藏窠堵波，即成佛曼荼羅窠堵波，即成一切如來藏塔。如來誠言作如是記別。金剛手！若有善男子善女人，於如來記別塔所，或花或香，或復合掌稽首作禮，或一旋遶，彼善男子善女人，苾芻、苾芻尼、優婆塞、優婆夷，即種植無量無邊善根，一切罪障悉皆消滅，一切地獄傍生皆得解脫，證得不退相莊嚴三摩地，身得清淨，乃至菩提場，一切善根無有窮盡，更不復生於母胎。金剛手！此陀羅尼甚難得聞。金剛手！若有人造佛形像，或泥或畫、或木或鈿、或以香泥、或以鑰石、或以熟銅、或以三金(金銀銅也)、或鐵或銀或金，或造窠堵波，

或紙或素書寫此陀羅尼并經及功能，安於舍利塔中及佛像中，應當供養禮拜。金剛手！彼苾芻、苾芻尼、優婆塞、優婆夷，善男子善女人，以如來先譬喻量、以如來校量功德數量、以佛眼觀察舍利數量、以大海滴數量，如是如來形像等量。若有苾芻、苾芻尼、優婆塞、優婆夷，善男子善女人，於一佛像或一塔中置此陀羅尼恭敬供養禮拜，是人即成供養禮拜爾所佛形像，獲得爾所福德聚。」

爾時金剛手祕密主白佛言：「世尊！此大陀羅尼教王，有大威德、有大福利、有大神通，纔稱名者獲大善根成就大福。」

爾時世尊告金剛手祕密主菩薩言：「金剛手！若有苾芻、苾芻尼、優婆塞、優婆夷，善男子善女人，欲滿大功德聚者，若欲供養過去未來現在一切諸佛如來者，應盡書寫此陀羅尼經置於篋中，日日供養及香水浴，旋遶禮拜。彼善男子善女人，苾芻、苾芻尼、優婆塞、優婆夷，所有過去未來現在如來，先所說譬喻數量者，悉皆成四事供養。當知此善男子善女人，一切如來加持、一切如來之所授記、一切如來皆所安慰，其人得不退轉。」

爾時世尊告文殊師利童真菩薩及金剛手祕密主菩薩、四大天王言：「我今付囑汝等佛子，此陀羅尼教王於末世勿令隱沒，應護受持此經有情，擁護長養，以各各自真言儀軌印契加持彼人。」

爾時文殊師利童真菩薩、金剛手大祕密主菩薩及四大天王從座而起，頭面禮足，作是言：「世尊！我等已受如來付囑此陀羅尼大教王，我當守護彼大丈夫受持此陀羅尼者，一切資具不令乏少，無歸無依者悉皆拔濟，乃至菩提場轉法輪我等咸皆護持。」爾時世尊告文殊師利童真菩薩、金剛手大祕密主菩薩、四大天王，讚言：「善哉善哉！汝等應當作如是事。」

爾時世尊普告大眾：「此陀羅尼能成辦一切事業、能與一切悉地、能消滅一切罪障，所作一切事業通達無礙。應身器清淨澡浴著新淨衣，每日誦一百八遍，即見一切諸佛，壽命百歲，遠離一切疾病，一切賢聖常當擁護，金剛手祕密主、四大天王亦常當擁護，一切意願皆得滿足，命終當生妙喜世界，不復於母胎中生，常得蓮華化生得宿命智。若誦二十一遍，當遠離決定地獄業，一切罪悉皆除滅，決定不墮於惡趣，於諸冤敵皆得勝。若誦七遍，一切鬪諍言訟論理得勝。當於白月十五日，一日一夜不食，清淨澡浴著新淨衣，對佛像結跏趺坐，以花香燈明供養世尊，誦此菩提場莊嚴陀羅尼一千遍。滿一千遍已，即見釋迦牟尼如來舒金色臂按行者頂，而安慰之，讚言：『善哉善哉！大持明者、大丈夫！汝所作菩提場莊嚴陀羅尼法已成就。汝持明者大勤勇精進，汝已作是勤苦，已圓滿多善根，所欲往佛世界隨願而往。』其持明者身有熾盛光明照耀一切，真言教法悉皆成就，日滿一切願。由作此法先行成就，設令作五無

間罪者，由一日一夜斷食念誦，其罪悉皆消滅、現世得成就。若於有舍利塔中，黑月十四日一日一夜不食，澡浴清淨身著淨衣，於熟銅器中滿盛白芥子，誦陀羅尼加持一千遍，即法成就，當一切處用。取白芥子一把散於龍池中，即一切龍歡喜隨順持誦者，彼等龍容許入於宮中，悉皆接足禮，彼人所處分悉皆奉教。取白芥子擲於虛空，霜雹即止，亦能制止暴風。

「若白芥子擲散四方，一切風雲、蚊虻、鸚鵡、鸚鵡、黃蟲、暴惡蟲獸等皆被禁縛口。

「若取白芥子擲於火中，火不能燒。

「擲於江河，水即不流。

「擲於商估中，不被賊劫，不見彼眾。

「擲於王宮門，國王大臣後宮悉令歡喜。

「擲於大眾，大眾皆共供養彼人。

「擲於他敵，彼軍眾即被禁止。

「若擲關戍守捉處，身隱即不現而過。

「若散於苗稼上，不被蟲傷。

「若天旱時擲於龍池，即降大雨。

「若暴雨時擲於空中，極暴雨止息。

「若擲冤家舍中，不復有恨。

「若擲於城門城內，一切逼迫悉皆消滅，一切夜叉、羅刹馳走而去。

「若鬪戰時擲散彼軍，即彼禁止，自軍得勝。若口中含，一切鬪諍言訟論理得勝。

「若置於水中與患者澡浴，一切疾病皆得除愈。

「若有人患諸鬼魅，取白芥子和沙糖燒熏病人，一切鬼魅皆得解脫。

「若有牛疫、諸畜疫、人疫、童男疫童女疫，於四衢道取白芥子和土燒，一切疫病悉皆止息。

「若於自頭髮中散，於一切處得人供養，一切人見皆生憐愛。

「若持誦者從十四日以二手按文殊師利菩薩足，從初夜至圓滿十五日晨朝無間念誦，文殊師利菩薩住行人前，一切意願皆得圓滿。若按金剛手菩薩足，誦陀羅尼加持一千八遍，以安悉香和酥燒，金剛手菩薩即現其前，一切意願盛事皆得成就，真言教法授與彼人，養育如子。

「又法若以二手按摩尼跋陀羅藥叉足，誦陀羅尼一千八遍，獲得廣大財寶，即現其身，所言皆作。

「若以手按毘沙門頂，燒沈水香，誦陀羅尼八十遍，即得一千金錢。

「又法若觀吉祥天女面，誦陀羅尼一千八遍，得一千金錢。

「又法若畫藥叉以五色彩成，誦陀羅尼一千二十遍，燒薩勒枳香(薰陸香也)，藥叉女現其人前，誓作為女使者，所為分事皆能成辦，乃至命存，成辦百種千種事、成就一切義利。

「我今說畫像法，能成就一切。取不截氈長四肘，擇去毛髮，不應用皮膠，畫人清淨受八戒，然後令畫。當中畫釋迦牟尼佛於寶樹下坐師子座，於釋迦牟尼佛上又畫一佛作說法相。其菩提樹，種種寶莊嚴。釋迦牟尼右邊畫聖文殊師利菩薩，種種寶瓔珞莊嚴，於蓮華上雙膝跪坐，二手捧鉢作獻佛勢。佛左邊畫聖金剛手菩薩，面貌忿怒嗔相，一切寶莊嚴身，手把金剛杵作旋轉勢，於蓮華上雙膝跪坐，瞻仰如來。聖文殊師利後畫寶幢，其量廣大，界道莊嚴。於幢中畫如來坐師子座，作安慰相。金剛手後畫菩提場莊嚴陀羅尼經夾，置於寶幢中。幢四面周匝畫佛，安置師子座上。於寶幢下畫金剛使者，作威怒形。於寶幢下畫吉祥天女。於佛下當中畫四大天王，皆被甲冑作威怒形。天王下畫持誦者，左手執香爐、右手把念珠，瞻視世尊。由畫此像，應墮惡趣者，謗方廣大乘、毀謗聖人、作五無間罪，若畫此像者悉皆消滅，其人得不退轉，何況能修持，其人等同如來。」

爾時世尊說菩提場陀羅尼曼荼羅法：「欲建立此曼荼羅者，或於寺內、或於天廟、或在山間、或於清淨隨自意樂處，依教平治其地，以瞿摩夷和土加持已，然後塗拭，其壇周圍十六肘量。其畫壇人清淨澡浴，然後令畫。四門四角鉤停。四角畫四天王，中央畫佛形像。於門中畫寶樹，於東門畫吉祥天女，南門畫辯才天女，西門商棄尼天女，北門花齒天女。畫壇了，以稻穀花和白芥子散於壇上，兼散時花塗香末香。四角安四香水餅，以四器盛食飲供養。四門安四香爐，兼諸飲食、種種花鬘及三白食。四角安四盞燈。念誦者面向東坐，應後夜入曼荼羅，護身結界。纔入此曼荼羅，一切罪障悉皆消滅、一切悉地皆得成就、一切福聚皆得生長，獲得佛菩提，遠離諸惡趣，不被一切鬼神侵擾，一切諸天悉皆擁護，晝夜常得安隱，兼諸助伴獲得大護。由入此曼荼羅得不退轉地，我今說心陀羅尼曰：

「唵薩嚩怛他(引)藥多尾也(二合)嚩路枳帝惹野惹野娑嚩(二合引)訶」

「心中心陀羅尼曰：

「唵虎嚕虎嚕惹野穆契娑嚩(二合引)訶(引)」

「澡浴灑淨陀羅尼：

「唵惹里爾惹曳娑嚩(二合引)訶(引)」

「結界陀羅尼：

「唵三曼多布(引)囉拏(二合)惹曳娑嚩(二合引)訶(引)」

「結曼荼羅界陀羅尼：
 「唵滿拏羅惹曳娑嚩(二合引)訶(引)」
 「供養食陀羅尼：
 「唵泉哩弭里惹曳娑嚩(二合引)訶(引)」
 「迎請陀羅尼：
 「唵薩嚩散馱嚩弭里惹曳娑嚩(二合引)訶(引)」
 「供養花陀羅尼：
 「唵沒馱矩素銘娑嚩(二合引)訶(引)」
 「供養燒香陀羅尼：
 「唵惹野嚩弟娑嚩(二合)訶(引)」
 「灌頂陀羅尼：
 「唵尾惹野槃陸娑嚩(二合引)訶」
 「結頂髻陀羅尼：
 「唵怛他(引)嚩多惹曳娑嚩(二合引)訶(引)」
 「加持衣服陀羅尼：
 「唵惹野勿哩(二合)弟娑嚩(二合引)訶(引)」
 「護弟子身加持陀羅尼：
 「唵矩攞馱哩娑嚩(二合引)訶(引)」
 「奉送聖眾陀羅尼：
 「唵馱囉馱囉弭里惹曳娑嚩(二合引)訶(引)」
 「加持念珠陀羅尼：
 「唵素三婆嚩惹曳娑嚩(二合)訶(引)」
 「獻座陀羅尼：
 「唵素那哩惹曳娑嚩(二合引)訶(引)」
 「縛毘那夜迦陀羅尼：
 「唵素哩惹曳娑嚩(二合引)訶(引)」
 「迎請一切如來陀羅尼：
 「唵鉢囉(二合)嚩囉惹野悉弟娑嚩(二合引)訶(引)」
 「護身陀羅尼：
 「唵囉乞叉(二合)尼惹曳娑嚩(二合引)訶」
 「供養燈陀羅尼：
 「唵惹野爾比寧娑嚩(二合引)訶(引)」
 「護摩陀羅尼：
 「唵麼黎尾麼羅惹曳娑嚩(二合引)訶(引)」
 「請一切如來陀羅尼：
 「唵娑囉娑婆囉惹曳悉弟娑嚩(二合引)訶」
 「我今說修行心陀羅尼中心陀羅尼功能。若誦心陀羅尼百千遍，
 得為持明仙中斫羯囉伐底。取雄黃置熟銅器中，加持千遍，取點

額，即得飛騰虛空，一切天龍八部宮門悉開得見，得入隨意遊行，壽命一劫。

「若加持掃尾羅眼藥百千遍用點眼，即得安怛那，一切鬼神宮悉皆開得入。

「又法誦一萬遍，得見一切如來。

「又法加持窣覩波櫟八千遍，安於塔上，一切如來舍利來入此塔，則成大舍利窣堵波塔。

「又法取文殊師利鉢，加持鉢八千遍，滿盛乳糜粥置文殊師利手，却從菩薩乞請，一千人喫此粥不盡。

「又法取餘部真言法，用此陀羅尼加持，隨心所欲隨作隨成。

「我今說印法。

「以二手平展，以右手押左手，仰掌安心上，名為菩提場莊嚴陀羅尼根本印。纒結此印，滅一切罪，一切如來安慰其人，亦成請一切如來。結此印，一切如來甚恭敬其人。

「即前根本印，舉右手，通一切處用，即成一切印，一切如來所加持。以右手安於臍下，以大指捻頭指頭，此印通一切印，一切如來所加持，由結此印遠離一切罪障。」

爾時文殊師利菩薩說陀羅尼，為護持此陀羅尼教法故。陀羅尼曰：

「曩謨曼殊室哩(二合)野耶俱摩囉部跢耶怛儂也(二合)他惹曳尾惹曳惹曳室哩(二合)儒瑟知(二合)吽娑嚩(二合)訶(引)」

「若念誦時、先行時、求成就時，先誦此陀羅尼七遍，即無障礙，速得成就。」

爾時金剛手祕密主菩薩說此大明陀羅尼曰：

「怛儂也(二合)他嚩日囉(二合)母瑟知(二合)訶曩娜訶跋遮嚩日囉(二合)吽泮吒娑嚩(二合)訶」

「以此陀羅尼加持白芥子七遍，念誦處散擲四方，即成大結界。」

爾時四大天王說真言曰：

「怛儂也(二合)他地哩(二合)底呬哩弭里娑囉鉢囉(二合)娑囉鼻里鼻里娑嚩(二合)訶」

「以此真言加持白芥子水三七遍，灌自頂，一切鬼神夜叉悉皆降伏，接足禮敬而退。」

爾時世尊說是經已，文殊師利童真菩薩、金剛手大祕密主菩薩、四大天王及一切天龍八部人非人等，聞佛所說，皆大歡喜，信受奉行。

菩提場莊嚴陀羅尼經◎

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
